

四庫全書

子部

欽定四庫全書

子部
經濟類編卷九十一

詳校官中書臣瞿 煦

主事臣 祁韻士覆勘

總校官知縣 臣 繆 琪

校對官編修 臣 沈清藻

謄錄監生 臣 胡金芝

欽定四庫全書

經濟類編卷九十一

明

馮琦馮瑗 撰

人事類三

警言戒

九則

齊桓公謂管仲曰請致仲父公與管仲父而將飲之掘
新井而柴焉十日齋戒召管仲管仲至公執爵夫人執
尊觴三行管仲趨出公怒曰寡人齋戒十日而飲仲父

寡人自以為修矣仲父不告寡人而出何也鮑叔隰朋趨而出及管仲於途曰公怒管仲反入倍屏而立公不與言少進中庭公不與言少進傳堂公曰寡人齋戒十日而飲仲父自以為脫于罪矣仲父不告寡人而出不知其故也對曰聞之沈于樂者洽于憂厚于味者薄于行慢于朝者緩于政害于國家者危于社稷臣是以敢出也公遽下堂曰寡人非敢自為修也仲父年長雖寡人亦衰矣吾願一朝安仲父也對曰臣聞壯者無怠老

者無偷順天之道必以善終者也三王失之也非一朝之萃君奈何其偷乎管仲走出

孔子曰不觀于高岸何以知顛墜之患不臨於深淵何以知沒溺之患不觀於海上何以知風波之患失之者其不在此乎士慎三者無累於人

魯哀公問孔子曰寡人生乎深宮之中長於婦人之手寡人未嘗知哀也未嘗知憂也未嘗知勞也未嘗知懼也未嘗知危也孔子避席曰吾君之問乃聖君之問也

丘小人也何足以言之哀公曰否吾子就席微吾子無所聞之矣孔子就席曰然君入廟門升自阼階仰見椽棟俯見几筵其器存其人亡君以此思哀則哀將安不至矣君昧爽而櫛冠平旦出而聽朝一物不應亂之端也君以此思憂則憂將安不至矣君平旦而聽朝日昃而退諸侯之子孫必有在君之門庭者君以此思勞則勞將安不至矣君出魯之四門以望魯之四郊亡國之墟列必有數矣君以此思懼則懼將安不至矣丘聞之

君者舟也度人者水也水則載舟水則覆舟君以此思危則危將安不至矣夫執國之柄履民之上凜乎如以腐索御奔馬易曰履虎尾詩曰如履薄冰不亦危乎哀公再拜曰寡人雖不敏請事斯語矣

楚莊王見天不見妖而地不出孽則禱于山川曰天其志予歟此能求過于天必不逆諫矣安不忘危故能終而成伯功焉

漢馮異自長安入朝光武謂公卿曰是我起兵時主簿也為吾披荆棘定關中既罷賜珍寶錢帛詔曰倉卒蕪蕪亭豆粥糜泥

河麥飯厚意久不報異稽首謝曰臣聞管仲謂桓公曰願君無忘射鈞臣無忘檻車齊國賴之臣今亦願國家無忘河北之難小臣不敢忘巾車之恩留十餘日今與妻子還西

晉惠帝反正嵇紹上疏曰臣聞改前轍者則車不傾草往弊者則政不爽大一統於元首百司役於多士故周文興於上成康穆於下也存不忘亡易之善義願陛下無忘金墉大司馬無忘潁上大將軍無忘黃橋則禍亂之萌無由而兆矣

唐太宗謂侍臣曰治國如治病病雖愈尤宜將護儻遽自放縱

病復作則不可救矣今中國幸安四夷俱服誠自古所希然
朕日慎一日惟懼不終故欲數聞知輩諫諍也魏徵曰內外
治安臣不以為喜惟喜陛下居安思危耳

魏徵上疏 人主善始者多克終者寡豈取之易而守之難
乎蓋以殷憂則竭誠以盡下安逸則驕恣而輕物盡下則胡
越同心輕物則六親離德雖震之以威怒亦皆貌從而心
不服故也人主誠能見可欲則思知足將興繕則思知止
處高危則思謙降臨滿盈則思挹損遇逸樂則思樽節在

宴安則思後患防擁蔽則思延納疾讒邪則思正己行爵
賞則思因喜而僭施刑罰則思因怒而濫兼是十思而選
賢任能固可以無為而治又何必勞神苦體以代百司之
任哉

後唐明宗與馮道從容語及年穀屢登四方無事道曰臣
常記昔在先皇幕府奉使中山歷井陘之險臣憂馬蹶執
轡甚謹幸而無失逮至平路放轡自逸俄至顛隕凡為天
下者亦猶是也明宗深以為然

斷無斷 八則

武王問太公曰得賢敬士或不能以為治者何也太公對曰不能獨斷以人言斷者殃也武王曰何為以人言斷太公對曰不能定所去以人言去不能定所取以人言取不能定所為以人言為不能定所罰以人言罰不能定所賞以人言賞賢者不必用不肖者不必退而士不必敬武王曰善其為國何如太公對曰夫為人惡聞其情而喜聞人之情惡聞其惡而喜聞人之惡是以不

必治也武王曰善

唐憲宗時諸將討淮西者勝則虛張殺獲敗則匿之至是大敗不可掩始上聞中外駭愕宰相入見將勸罷兵上曰勝負兵家之常今但當論用兵方略察將帥之不勝任者易之兵食不足者助之耳豈得以一將失利遽議罷兵邪於是獨用裴度之言他人言罷兵者亦稍息矣

薛茂卿破科斗寨擒河陽大將馬繼等焚掠小寨一十

七距懷州纔十餘里茂卿以無劉稹之命故不敢入時
議者鼎沸以為劉悟有功不可絕其嗣又從諫養精兵
十萬糧支十年如何可取武宗亦疑之以問李德裕對
曰小小進退兵家之常願陛下勿聽外議則成功必矣
上乃謂宰相曰為我語朝士有上疏沮議者必於賊境
上斬之議者乃止

宋田錫斷論 謀慮者斷之始也勇敢者斷之用也若
謀慮未甚精成敗未盡見情偽未洞知而不忍欲利欲

勝之意不忍小忿小恥之心卒然奮發自謂決斷斯乃
剛忽而趣敗也安得謂之斷哉若謀慮已精成敗已見
情偽已審而猶疑事或未濟尚憂理之未盡猶豫於大
難惶惑於臨機本謀亂而不能堅守始慮撓而不能必
行是謂無斷也噫排大難濟大事立大功垂大名皆由
於斷也陷大惡致大亂墮大功失大事亦由於斷也蓋
謀熟而後斷則大功大名隨之而興矣智淺而言斷則
大惡大亂亦隨之而陷矣昔桀惡日盈湯德日新干戈

未舉成敗之數先定也湯乃勃興應天順人一戰而克
遂自諸侯而為萬乘主斯則湯之智慮已精成敗已見
而果敢於斷也其次商紂縱虐而文王之德素積於民
民心歸周久矣一旦武法成湯之舉師次牧野風裂旗
旆武王震恐以為天意未從遽思中輟唯太公獨排衆
意以為必克是則武王之斷未侔於太公洎秦滅六國
威名雄迹信有英斷長戟巨鍛銷為金狄聖謀國典焚
為煨燼將以弱諸侯之兵也將以愚天下之民也若是

果斷自謂超三王邁五帝然而陷大惡致大亂失大位
得非斷於強暴而不斷於仁信乎由是知有斷於威武
也有斷於為仁也有斷於用賢也有斷於貞介也許由
棄堯之禪讓伯夷絕周之蔬粟是斷於貞介也管蔡流
言周公誅之大義滅親之斷自周公始也龍逢比干以
諫而死是斷於為忠也伊霍廢黜由己是斷於為大節
也燕王用樂生雖謗書盈篋而委任愈堅此則斷於用
人也項籍勇傑不能終用范增所以霸王之業卒為漢

有豈非無斷於推心乎世祖單騎入銅馬之軍人人相
悅悅其推心也唐太宗之初頡利控弦者二十萬臨於
渭濱太宗單騎隔水責之戎人畏伏下馬謝罪于特臣
僚進諫以為輕敵上曰國家初定若示之弱即生戎心
所謂智略周通而決斷果敢也漢祖數項羽之罪而弩
矢竊發責敵之罪頗類太宗然為飛鏃所中萬一不幸
即漢祖之斷有餘而料敵之智或淺也有以見楚子投
袂而起孟明焚舟而前是皆幸而成功豈是善謀而能

斷哉夫智與斷在乎兼備也若差之毫釐失之千里使漢祖從酈生之言斷而不疑則功業無因而濟矣使太宗從高祖之言疑而不斷則國家無因而變矣今之論者皆以韓信不從蒯通之言謂之無斷錫以為韓信不斷於為忠而猶豫思亂以取誅滅也何哉當蒯通說時其心不回謂受漢恩深不忍叛也及其功高而疑生勢逼而猜起不能堅守初志卒與陳豨謀亂何始於忠而終於逆蓋無斷於忠節也非無斷於逆亂也詩所謂鮮

克有終其是謂乎亦猶孝景始用晁錯之言從之如順
流將削七國之封弱枝而強本一旦七國共叛遽聽袁
盎之言誅錯以謝七國錯既誅而亂不息豈非孝景無
斷於用人而反感讒誣之言哉若成與敗但思一決而
不圖始終慨然自謂決斷不其謬歟故管仲不死子糾
之難非無斷也非其死所也晉宣得巾幗之贈不敢出
戰非無斷也戰未便也是知智計明然後決斷則事無
不濟矣

已上四則斷

子路問于孔子曰治國何如孔子曰在于尊賢而賤不肖子路曰范中行氏尊賢而賤不肖其亡何也曰范中行氏尊賢而不能去也賤不肖而不能去也賢者知其不己用而怨之不肖者知其賤已而讐之賢者怨之不肖者而讐之怨讐並前中行氏雖欲無亡得乎

齊桓公出遊於野見亡國故城郭氏之墟問於野人曰是為何墟野人曰是為郭氏之墟桓公曰郭氏者曷為墟野人曰郭氏者善善而惡惡桓公曰善善而惡惡人

之善行也其所以為墟者何也野人曰善善而不能行
惡惡而不能去是以為墟也桓公歸以語管仲曰其人
為誰桓公曰不知也管仲曰君亦一郭氏也於是桓公
招野人而賞焉

晉文公田於虢遇一老夫而問曰虢之為虢久矣子處
此故矣虢亡其有說乎對曰國君斷則不能諫則無與
也不能斷又不能用人此虢之所以亡文公已輟田而
歸遇趙衰而告之趙衰曰今其人安在君曰吾不與之

來也趙衰曰古之君子聽其言而用其人今之君子聽其言而棄其身哀哉晉國之憂也文公乃召賞之於是晉國樂納善言文公卒以霸

鄭伯將以高渠彌為卿昭公惡之固諫不聽及昭公即位懼其殺已也辛卯弑昭公而立子亶也君子曰昭公知所惡矣公子圍曰高伯其為戮乎報惡已甚矣或曰公子圍之言也不亦反乎昭公之及於難者報惡晚也然則高伯之晚於死者報惡未甚也明君不懸怒懸怒

則臣懼罪輕舉以行計則人主危故靈臺之飲衛侯怒而不誅故褚師作難食鼃之美鄭君怒而不誅故子公弑君君子之舉知所惡非甚之也曰知之若是其明也而不行誅焉以及於死故曰知所惡以見其無權也人君非獨不足於見難而已或不足於斷制今昭公見惡稽罪而不誅使渠彌舍憎懼死以徼幸故不免於殺是昭公之報惡不甚也或曰報惡甚者大誅報小罪大誅報小罪也者獄之至也獄之患故非在所以誅也以讐

之衆也是以晉厲公滅三郟而欒中行作難鄭子都殺伯咺而食鼎起禍吳王誅子胥而越勾踐成霸則衛侯之逐鄭靈之弑不以褚師之不死而子公之不誅也以未可以怒而有怒之色未可誅而有誅之心怒之當罪而誅不逆人心雖懸奚害夫未立有罪即位之後宿罪而誅齊胡之所以滅也君行之臣猶有後患况為臣而行之君乎誅既不當而以盡為心是與天下為讐也則雖為戮不亦可乎哉

以上四則無斷

改過
五則

秦后子有寵於桓如二君於景其母曰弗去懼選癸卯
鍼適晉其車千乘后子享晉侯造舟于河十里舍車自
雍及絳歸取酬幣終事八反司馬侯問焉曰子之車盡
於此而已乎對曰此之謂多矣君能少此吾何以得見
女叔齊以告公且曰秦公子必歸臣聞君子能知其過必
有令圖令圖天所贊也

晉周處字子隱父魴吳鄱陽太守處少孤未弱冠膂力

絕人好馳騁田獵不脩細行縱情肆慾州曲患之處自知為人所惡乃慨然有改勵之志謂父老曰今時和歲豐何若不樂邪父老歎曰三害未除何樂之有處曰何謂也答曰南山白額猛獸長橋下蛟并子為三矣處曰若此為患吾能除之父老曰子若除之則一郡之大慶非徒去害而已處乃入山射殺猛獸因投水搏蛟蛟或沉或浮行數十里而處與之俱經三日三夜人謂死皆相慶賀處果殺蛟而反聞鄉里相慶始知人患己之甚

乃入吳尋二陸時機不在見雲具以情告曰欲自修而
年已蹉跎恐將無及雲曰古人貴朝聞夕改君前途尚
可且患志之不立何憂名之不彰處遂勵志好學有文
思志存義烈言必忠信克已期年州府交辟

宋薛居正輔相十八年寬簡不苛察衆論賢之因服丹
砂遇毒方奏事疾作輿歸遂卒太宗親臨其喪為之流
涕居正子惟吉素無行帝存問其家因曰不肖子安在
頗改節否不克負荷先業奈何惟吉伏喪側懼赧不敢

起自是盡革故態讀書親賢士修飾為善其後帝數委以大藩所至稱治

王安石原過論 天有過乎有之陵歷鬪蝕是也地有過乎有之崩弛竭塞是也天地舉有過卒不累覆且載者何善復常也人介乎天地之間則固不能無過卒不害聖且賢者何亦善復常也故太甲思庸孔子曰勿憚改過揚雄貴遷善皆是術也予之朋有過而能悔悔而能改人則曰是向之從事云爾今從事與向之從事弗

類非其性也飾表以疑世也夫豈知言哉天播五行於萬靈人固備而有之有而不思則失思而不行則廢一日咎前之非沛然思而行之是失而復得廢而復舉也顧曰非其性是率天下而戕性也且如人有財見篡於盜已而得之曰非夫人之財向篡於盜矣可毀不可也財之在己固不若性之為己有也財失復得曰非其財且不可性失復得曰非其性可乎

蘇軾觀過斯知仁矣論 孔子曰人之過也各於其黨

觀過斯知仁矣自孔安國以下解者未有得其本旨者也禮曰與仁同功其仁未可知也與仁同過然後其仁可知也聞之于師曰此論語之義疏也請得以論其詳人之難知也江海不足以喻其深山谷不足以配其險浮雲不足以比其變楊雄有言有人則作之無人則輟之夫苟見其作而不見其輟雖盜跖為伯夷可也然古人有名知人者其效如影嚮其信如著龜此何道也故彼其觀人也亦多術矣委之以利以觀其節乘之以猝

以觀其量伺之以獨以觀其守懼之以敵以觀其氣故
晉文公以壺飧得趙衰郭林宗以破甑得孟敏是豈一
道也哉夫與仁同功而謂之仁則公孫弘之布被與子
路之緼袍何異陳仲子之螬李與顏淵之簞瓢何辨何
則功者人所趨也過者人所避也審其趨避而真偽見
矣古人有言曰鉏麇違命也推其仁可以託國斯其為
觀過知仁也歟

悔過

二則附

中行文子出亡至邊從者曰為此嗇夫者君人也胡不
休焉且待後車者文子曰異日吾好音此子遺吾琴吾
好佩又遺吾玉是不非吾過者也自容於我者也吾恐
其以我求容也遂不入後車入門文子問嗇夫之所在
執而殺之仲尼聞之曰中行文子背道失義以亡其國
然後得之猶活其身道不可遺也若此

唐陸贄言于德宗曰昔成湯以罪已勃興楚昭以善言
復國陛下誠能不吝改過以謝天下使書詔之辭無所

避忌則反側之徒革心向化矣上然之故奉天所下書
詔雖驕將悍卒聞之無不感激揮涕

謝過

五則附

燕王喜使栗腹以百金為趙孝成王壽酒三日反報曰
趙民其壯者皆死於長平其孤未壯可伐也王乃召昌
國君樂閒而問曰何如對曰趙四達之國也其民皆習
於兵不可與戰王曰吾以倍攻之可乎曰不可曰以三
可乎曰不可王大怒左右皆以為趙可伐遽起六十萬

以攻趙令粟腹以四十萬攻鄢使慶秦以二十萬攻代
趙使廉頗以八萬遇粟腹於鄢使樂乘以五萬遇慶秦
於代燕人大敗樂開入趙燕王以書且謝焉曰寡人不
佞不能奉順君意故君捐國而去則寡人之不肖明矣
敢端其願而君不肯聽故使使者陳愚意君試論之語
曰仁不輕絕智不輕怨君之於先王也世之所明知也
寡人望有非則君掩蓋之不虞君之明罪之也望有過
則君教誨之不虞君之明棄之也且寡人之罪國人莫

不知天下莫不聞君微出明怨以棄寡人寡人必有罪矣雖然恐君之未盡厚也諺曰厚者不毀人以自益也仁者不危人以要名也故掩人之邪者厚人之行也救人之過者仁者之道也世有掩寡人之邪救寡人之過非君孰望之今君厚受位於先王以成尊輕棄寡人以快心則掩邪救過難得於君矣且世有薄而故厚施行有失而故惠用今使寡人任不肖之罪而君有失厚之累於為君擇之也無所取之國之有封疆家之有垣牆所

以合好掩惡也室不能相和出語鄰家未為通計也怨惡未見而明棄之未為盡厚也寡人雖不肖乎未如殷紂之亂也君雖不得意乎未如商容箕子之累也然則不內蓋寡人而明怨於外恐其適足以傷於高而薄於行也非然也苟可以明君之義成君之高雖任惡名不難受也本欲以為明寡人之薄而君不得厚揚寡人之辱而君不得榮此一舉而兩失也義者不虧人以自益况傷人以自損乎君無以寡人不肖累往事之美昔者

柳下惠吏於魯三黜而不去或謂之曰可以去柳下惠曰苟與人之異惡往而不黜乎猶且黜乎寧於故國爾柳下惠不以三黜自累故前業不忘不以去為心故遠近無議今寡人之罪國人未知而議寡人者徧天下語曰論不脩心議不累物人不輕絕智不簡功簡棄大功者輟也輕絕厚利者怨也輟而棄之怨而累之宜在遠者不望之乎君也今以寡人無罪君豈怨之乎願君捐怨追惟先王復以教寡人意君曰余且慝心以成而過

不顧先王以明而惡使寡人進不得脩功退不得改過君之所揣也唯君圖之此寡人之愚意也敬以書謁之樂閒乘怨不用其計二人卒留趙不報

漢豫州刺史梁相舉奏梁節王暢不道考訊辭不服有司請徵暢詣廷尉詔獄和帝不許有司重奏除暢國徙九真帝不忍但削成武單父二縣暢慙懼上疏辭謝

臣天性狂愚生在深宮長養傅母之手信惑左右之言及至歸國不知防禁從官侍史利臣財物榮惑臣暢臣

暢無所昭見與相然諾不自知陷死罪以至考案肌慄
心悸自悔無所復及自謂當即時伏顯誅魂魄去身分
歸黃泉不意陛下聖德枉法曲平不聽有司橫貸赦臣
戰慄連月未敢自安上念以負先帝而今陛下為臣收
汗天下誠無氣以息筋骨不相連臣暢知大貸不可再
得自誓束身約妻子不敢復出入失繩墨不敢復有所
橫費租入有餘乞裁食雒陽穀孰虞蒙寧陵五縣還餘
所食四縣臣暢小妻三十七人其無子者願還本家自

選擇謹勅奴婢二百人其餘所受虎賁官騎及諸工技
鼓吹蒼頭奴婢兵弩廐馬皆上還本署臣暢以骨肉近
親亂聖化汙清流既得生活誠無心面目以凶惡復居
大宮食大國張官屬藏什物願陛下加大恩開臣自悔
之門假臣遷善之路令天下知臣蒙恩得去死就生頗
能自悔臣以公卿所奏臣罪惡詔書常置於前晝夜誦
讀臣小人貪見明時不能即時自引惟陛下哀臣令得
喘息漏刻若不聽許臣實無顏以久生下入黃泉無以

見先帝此誠臣至心臣欲多還所受恐天恩不聽許節
量所留於臣暢饒足

寇榮少知名桓帝時為侍中性矜潔自貴於人少所與
以此見害於權寵而從兄子尚帝妹益陽長公主帝又
聘其從孫女於後宮左右益惡之延熹中遂陷以罪辟
與宗族免歸故郡吏承望風旨持之浸急榮恐不免奔
闕自訟未至刺史張敬追劾榮以擅去邊有詔捕之榮
逃竄數年會赦令不得除積窮困乃自亡命中上書

臣聞天地之於萬物也好生帝王之於萬人也慈愛陛下統天理物為萬國覆作人父母先慈愛後威武先寬容後刑辟自生齒以上咸蒙德澤而臣兄弟獨以無辜為專權之臣所見批抵青蠅之人所共構會以臣婚姻王室謂臣將撫其背奪其位退其身受其執於是遂作飛章以被於臣欲使墜萬仞之坑踐必死之地令陛下忽參母之仁發投杼之怒尚書背繩墨案空劾不復質確其過寘於嚴棘之下便奏正臣罪司隸校尉馮羨佞

邪承旨廢於王命驅逐臣等不得旋踵臣奔走還郡沒齒無怨臣誠恐卒為豺狼橫見噬食故冒死欲詣闕披肝膽布腹心刺史張敬好為諂諛張設機網復令陛下興雷電之怒司隸校尉應奉河南尹何豹洛陽令袁騰並驅爭先若赴仇敵罰及死沒髡剔墳墓但未掘壙出尸剖棺露齒耳昔文王葬枯骨公劉敦行葦世稱其仁今殘酷容媚之吏無折中處平之心不顧無辜之害而興虛誣之誹欲使嚴朝必加濫罰是以不敢觸突天威

而自竄山林以俟陛下發神聖之聽啓獨覩之明拒讒
慝之謗絕邪巧之言救可濟之人援投溺之命不意滯
怒不為春夏息淹恚不為順時怠遂馳使郵驛布告遠
近嚴文剋剝痛於霜雪張羅海內設置萬里逐臣者窮
人迹追臣者極車軌雖楚購伍員漢求季布無以過也
臣遇罰以來三赦再贖無驗之罪足以蠲除而陛下疾
臣愈深有司咎臣甫力止則見掃滅行則為亡虜苟生
則為窮人極死則為冤鬼天廣而無以自覆地厚而無

以自載蹈陸土而有沉淪之憂遠巖牆而有鎮壓之患
精誠足以感於陛下而哲王未肯悟如臣犯元惡大愆
足以陳於原野備刀鋸陛下當班布臣之所坐以解衆
論之疑臣思入國門坐於肺石之上使三槐九棘平臣
之罪而閭閻九重陷窅步設舉趾觸杙且動行絳羅網
無緣至萬乘之前永無見信之期矣國君不可讐匹夫
讐之則一國盡懼臣奔走以來三離寒暑陰陽易位當
煖反寒春常淒風夏降霜電又連年大風折拔樹木風

為號令春夏布德議獄緩死之時願陛下思帝堯五教
在寬之德企成湯避遠讒夫之誠以寧風旱以弭災兵
臣聞勇者不逃死智者不重困固不為明朝惜垂盡之
命願赴湘沅之波從屈原之悲沈江湖之流弔子胥之
哀臣功臣苗緒生長王國懼獨舍恨以葬江魚之腹無
以自別於世不勝孤死首丘之情營魂識路之懷犯冒
王怒觸突帝禁伏於兩觀陳訴毒痛然後登金鑊入沸
湯靡爛於熾爨之下九死未悔悲夫久生亦復何聊蓋

忠臣殺身以解君怒孝子殞命以寧親怨故大舜不避
塗廩浚井之難申生不辭姬氏讒邪之謗臣敢忘斯議
不自斃以解明朝之忿哉乞以身塞重責願陛下勾兄
弟死命使臣一門頗有遺類以崇陛下寬饒之惠先死
陳情臨章涕泣

趙壹西還道經弘農過候太守皇甫規門者不即通壹
遂遁去門吏懼以白之規聞壹名大驚乃追書謝曰蹉
跌不面企德懷風虚心委質為日久矣側聞仁者愍其

區區冀承清誨以釋遙悚今旦外白有一尉兩計吏不
道屈尊門下更啓乃知己去如印綬可投夜豈待旦惟
君明叡平其夙心寧當慢傲加于所天事在悖惑不足
具責儻可原察追脩前好則何福如之謹遣主簿奉書
下筆氣結汗流竟趾壹報曰君學成師範縉紳歸慕仰
高希驥歷年滋多旋轅兼道渴于言侍沐浴晨興昧旦
守門實望仁兄昭其懸遲以貴下賤握髮垂接高可敷
翫墳典起發聖意下則抗論當世消弭時災豈悟君子

自生怠倦失恂恂善誘之德同亡國驕惰之志蓋見幾而作不俟終日是以夙退自引畏使君勞昔人或歷說而不遇或思士而無從皆歸之于天不尤于物今壹自譴而已豈敢有猜仁君忽一匹夫于德何損而遠辱手筆追路相尋誠足愧也壹之區區曷云量已其嗟可去謝也可食誠則頑薄實識其趣但關節痰動膝灸壞潰請俟他日乃奉其情輒誦來貺永以自慰遂去不顧

晉成帝時蘇峻平庾亮泥首謝罪乞骸骨欲闔門投竄

山海帝遣尚書侍中手詔慰諭此社稷之難非舅之責也亮上疏曰臣凡鄙小人才不經世階緣戚屬累忝非服叨竊彌重謗議彌興皇家多難未敢告退遂隨牒展轉便煩顯任先帝不豫臣參侍醫藥登遐顧命又豫聞後事豈云德授蓋以親也臣知其不可而不敢逃命實以田夫之交猶有寄託况君臣之義道貫自然哀悲眷戀不敢違距且先帝謬顧情同布衣既今恩重命輕遂感遇忘身加以陛下初在諒闇先后親覽萬機宣通外

內臣當其地是以激節驅馳不敢依違雖知無補
志以死報而才下位高知進志退乘寵驕盈漸不
自覺進不能撫寧外內退不能推賢宗長遂使四
海側心謗議沸騰祖約蘇峻不堪其憤縱肆克逆
事由臣發社稷傾覆宗廟虛廢先后以憂逼登遐
陛下旰食踰年四海哀惶肝腦塗地臣之招也臣
之罪也朝廷寸斬之屠戮之不足以謝祖宗七廟
之靈臣灰身滅族不足以塞四海之責臣負國家

其罪莫大實天所不覆地所不載陛下矜而不誅
有司縱而不戮自古及今豈有不忠不孝如臣之
甚不能伏劔北闕偷存視息雖生之日亦猶死之
年朝廷復何理齒臣於人次臣亦何顏自次於人
理臣欲自投草澤思譽之心也而明詔謂之獨善
其身聖旨不垂矜察所以重其罪也願陛下覽先
朝謬授之失雖垂寬宥全其首領猶宜棄之任其
自存自沒則天下粗知勸戒之綱矣疏奏詔曰省

告懇惻執以感歎誠是仁舅處物宗之責理亦盡
矣若大義既不開塞舅所執理勝何必區區其相
易奪賤峻奸逆書契所未有也是天地所不容人
神所不宥今年不反明年當反愚智所見也舅與
諸公勃然而召正是不忍見無禮於君者也論情
與義何得謂之不忠乎若以已總率征討事至敗
喪有司宜明直繩以肅國體誠則然矣且舅遂上
告方伯席卷來下舅躬貫甲冑賤峻梟懸大事既

平天下開泰行得反正社稷又安宗廟有奉豈非
舅二三方伯亡身陳力之勲邪方當策勲行賞豈
復議既往之咎乎且天下大弊死者萬計而與桀寇
對岸舅且當上奉先帝顧託之旨弘濟艱難使行
冲人永有憑賴則天下幸甚亮欲遁逃山海自暨
陽東出詔有司錄奪舟船亮乃求外鎮自効出為
持節都督豫州揚州之江西宣城諸軍事平西將
軍假節豫州刺史領宣城内史

使過 二則

秦伯伐晉濟河焚舟取王官及郊晉人不出遂自茅津
濟封殽尸而還遂霸西戎用孟明也君子是以知秦穆
公之為君也舉人之周也與人之壹也孟明之臣也其
不解也能懼思也子桑之忠也其知人也能舉善也詩
曰于以采蘋于沼于汙于以用之公侯之事秦穆有馬
夙夜匪懈以事一人孟明有馬詒厥孫謀以燕翼子子
桑有馬

晉師歸桓子請死晉侯欲許之士貞子諫曰不可城濮之役晉師三日穀文公猶有憂色左右曰有喜而憂如有憂而喜乎公曰得臣猶在憂未歇也困獸猶鬪况國相乎及楚殺子玉公喜而後可知也曰莫余毒也已晉再克而楚再敗也楚是以再世不競今天或者大警晉也而又殺林父以重楚勝其無乃久不競乎林父之事君也進思盡忠退思補過社稷之衛也若之何殺之夫其敗也如日月之食焉何損於明晉侯使復其位

分過 三則

宋皇國父為大宰為平公築臺妨於農收子罕請俟農
功之畢公弗許築者謳曰澤門之皙實興我役邑中之
黔實慰我心子罕聞之親執扑以行築者而扶其不勉
者曰吾儕小人皆有闔廬以辟燥濕寒暑今君為一臺
而不速成何以為役謳者乃止或問其故子罕曰宋國
區區而有詛有祝禍之本也

靡笄之役韓獻子將斬人郟獻子聞之駕往救之比至

則已斬之矣。郤子因曰：胡不以殉其僕？曰：曩不將救之乎？郤子曰：吾敢不分謗乎？或曰：郤子言不可不察也。非分謗也。韓子之所斬也。若罪人則不可救，救罪人法之所以敗也。法敗則國亂，若非罪人則勸之以殉，勸之以殉是重不辜也。重不辜民所以起怨者也。民怨則國危。郤子之言非危則亂不可不察也。且韓子之所斬若罪人，郤子奚分焉？斬若非罪人則已斬之矣。而郤子乃至是韓子之謗已成，而郤子且後至也。夫郤子曰以殉不

足以分斬人之謗而又生殉之謗是何言分謗也昔者
紂為炮烙崇侯惡來又曰斬涉者之脛也奚分於紂之
謗且民之望於上也甚矣韓子弗得將郤子之得之也
今郤子俱弗得則民絕望於上矣故曰郤子之言非分
謗也益謗也且郤子之往救罪也以韓子為非也不道
其所以為非而勸之以殉是使韓子不知其過也夫下
使民望絕於上又使韓子不知其失吾未得郤子之所
以分謗者也

漢陳寔為郡功曹時中常侍侯覽託太守高倫用吏倫
教署為文學掾寔知非其人懷檄請見言曰此人不宜
用而侯常侍不可違寔乞從外署不足以塵明德倫從
之於是鄉論怪其非舉寔終無所言倫後被徵為尚書
郡中士大夫送至輪氏傳舍倫謂衆人言曰吾前為侯
常侍用吏陳君密持教還而於外白署比聞議者以此
少之此咎由故人畏憚強禦陳君可謂善則稱君過則
稱己者也寔固自引愆聞者方嘆息由是天下服其德

奸邪 十五則

韓非八姦篇 凡人臣之所道成姦者有八術一曰在同牀何謂同牀曰貴夫人愛孺子便嬖好色此人主之所惑也託於燕處之虞乘醉飽之時而求其所欲此必聽之術也為人臣者內事之以金玉使惑其主此之謂同牀二曰在旁何謂在旁曰優笑侏儒左右近習此人主未命而唯唯未使而諾諾先意承旨觀貌察色以先主心者也此皆俱進俱退皆應皆對一辭同軌以移主

心者也為人臣者內事之以金玉玩好外為之行不法使之化其主此之謂在旁三曰父兄何謂父兄曰側室公子人主之所親愛也大臣廷吏人主之所與度計也此皆盡力畢議人主之所必聽也為人臣者事公子側室以音聲子女收大臣廷吏以辭言處約言事事成則進爵益祿以勸其心使犯其主此之謂父兄四曰養殃何謂養殃曰人主樂美宮室臺池好飾子女狗馬以娛其心此人主之殃也為人臣者盡民力以美宮室臺池

重賦歛以飾子女狗馬以娛其主而亂其心從其所欲而樹私利其間此謂養殃五曰民萌何謂民萌曰為人臣者散公財以說民人行小惠以取百姓使朝廷市井皆勸譽已以塞其主而成其所欲此謂之民萌六曰流行何謂流行曰人主者固壅其言談希於聽論易移以辯說為人臣者求諸侯之辯士養國中之能說者使之以語其私為巧文之言流行之辭示之以利勢懼之以患害施屬虛辭以壞其主此之謂流行七曰威強何謂

威強曰君人者以羣臣百姓為威強者也羣臣百姓之所善則君善之非羣臣百姓之所善則君不善之為人臣者聚帶劍之客養必死之士以彰其威明為己者必利不為己者必死以恐其羣臣百姓而行其私此之謂威強八曰四方何謂四方曰君人者國小則事大國兵弱則畏強兵大國之所索小國必聽強兵之所加弱兵必服為人臣者重賦斂盡府庫虛其國以事大國而用其威求誘其君甚者舉兵以聚邊境而制斂於內薄者

數內大使以震其君使之恐懼此之謂四方凡此八者
人臣之所以道成姦世主所以壅劫失其所有也不可
不察焉明君之於內也娛其色而不行其謁不使私請
其於左右也使其身必責其言不使益辭其於父兄大
臣也聽其言也必使以罰任於後不令妄舉其於觀樂
玩好也必令之有所出不使擅進不使擅退羣臣虞其
意其於德施也縱禁財發墳倉利於民者必出於君不
使人臣私其德其於說議也稱譽者所善毀疵者所惡

必實其能察其過不使羣臣相為語其於勇力之士也
軍旅之功無踰賞邑鬪之勇無赦罪不使羣臣行私財
其於諸侯之求索也法則聽之不法則距之所謂亡君
者非莫有其國也而有之者皆非已有也令臣以外為
制於內則是君人者亡也聽大國為救亡也而亡亟於
不聽故不聽羣臣羣臣知不聽則不外市諸侯諸侯知
不聽則不受臣之誣其君矣明主之為官職爵祿也所
以進賢材勸有功也故曰賢材者處厚祿任大官功大

者有尊爵受重賞官賢者量其能賦祿者稱其功是以
賢者不誣能以事其主有功者樂進其業故事成功立
今則不然不課賢不肖論有功勞用諸侯之重聽左右
之謁父兄大臣上請爵祿於上而下賣之以收財利及
以樹私黨故財利多者買官以為貴有左右之交者請
謁以成重功勞之臣不論官職之遷失謬是以吏偷官
而外交棄事而財親是以賢者懈怠而不勸有功者墮
而簡其業此亡國之風也

唐明皇時南詔數寇邊蜀人請楊國忠赴鎮李林甫奏遣之國忠將行泣辭明皇言必為林甫所害貴妃亦為之請明皇謂國忠曰卿暫到蜀區處軍事朕屈指待卿還當入相林甫時已有疾憂懣不知所為巫言一見上可小愈明皇欲就視之左右固諫明皇乃命林甫出庭中明皇登降聖閣遙望以紅巾招之林甫不能拜使人代拜國忠比至蜀明皇遣中使召還至昭應謁林甫拜於牀下林甫流涕謂曰林甫死矣公必為相以後事累

公國忠謝不敢當汗流覆面明皇晚年自恃承平以為天下無復可憂遂深居禁中專以聲色自娛悉委政事於林甫林甫媚事左右迎合上意以固其寵杜絕言路掩蔽聰明以成其姦妬賢疾能排抑勝己以保其位屢起大獄誅逐貴臣以張其勢自皇太子以下畏之側足凡在相位十九年養成天下之亂而明皇不之寤也

安祿山與王鉞俱為大夫鉞權任亞於李林甫祿山見林甫禮貌頗倨林甫陽以它事召王大夫鉞至趨拜甚

謹祿山不覺自失容貌益恭林甫與祿山語每揣知其情先言之祿山驚服祿山於公卿皆慢侮之獨憚林甫每見雖盛冬常汗沾衣林甫乃引與坐於中書廳撫以溫言自解披袍以覆之祿山忻荷言無不盡謂林甫為十郎既歸范陽劉駱谷每自長安來必問十郎何言得美言則喜或但云語安大夫須好檢校輒反手據牀曰噫嘻我死矣

李林甫柔佞多狡數深結宦官及妃嬪家伺候明皇動

靜無不知之由是每奏對常稱旨明皇悅之時武惠妃
寵幸傾後宮生壽王清諸子莫得為比太子浸疎薄林
甫乃因宦官言於惠妃願盡力保護壽王惠妃德之陰
為內助由是擢黃門侍郎

裴遵慶既罷去政事元載權益盛以貨結內侍董秀使
主書卓英倩潛與往來代宗意所屬載必先知之承意
探微言無不合

李懷光性粗疎自山東來赴難數與人言盧杞趙贊白

志貞之姦佞且曰天下之亂皆此曹所為也吾見上當請誅之既解奉天之圍自矜其功謂德宗必接以殊禮或說王翊趙贊曰懷光緣道憤歎以為宰相謀議乖方度支賦斂煩重京尹犒賜刻薄致乘輿播遷者三臣之罪也今懷光新立大功上必披襟布誠詢訪得失使其言入豈不殆哉翊贊以告盧杞杞懼從容言於德宗曰懷光勲業社稷是賴賊徒破膽皆無守心若使之乘勝取長安則一舉可以滅賊此破竹之勢也今聽其入朝

必當賜宴留連累日使賊入京城得從容成備恐難圖矣
德宗以為然詔懷光直引軍屯便橋與李建徽李晟及神
策兵馬使楊惠元刻期共取長安懷光自以數千里竭誠
赴難破朱泚解重圍而咫尺不得見天子意殊怏怏曰吾今已
為姦臣所排事可知矣遂引兵去至魯店留二日乃行
盧杞秉政知德宗必更立相恐其分已權乘間薦吏部
侍郎闕播儒厚可以鎮風俗以播為中書侍郎同平章
事政事皆決於杞播但斂衽無所可否德宗嘗從容與

宰相論事播意有所不可起立欲言杞目之而止還至中書杞謂播曰以足下端慙少言故相引至此鄉者柰何發口欲言邪播自是不復敢言

宋徽宗時蔡攸有寵進見無時與王黼得預宮中秘戲或侍曲宴則攸黼著短衫窄袴塗抹青紅雜倡優侏儒中多道市井淫媠謔浪語以獻笑取悅攸妻宋氏出入禁掖攸子行領殿中監寵信傾其父攸嘗言於帝曰所謂人主當以四海為家太平為娛歲月能幾何豈徒自

勞苦帝深納之因令苑囿皆倣江浙為白屋不施瓦采
多為村居野店及聚珍禽異獸動數千百以實其中都
下每秋風夜靜禽獸之聲四徹宛然山林陂澤之間識
者以為不祥之兆

秦檜病高宗幸其第問焉無一語惟流涕而已檜奏請
代居相位者為誰帝曰此事卿不當與帝還宮命沈虛
中草檜及熺制並令致仕熺夜遣頃與右司員外郎林
一飛宗正丞鄭柟見其黨殿中侍御史余嘉右正言張

扶謀請已為相檜卒遺表有云願陛下固鄰國之權盟
謹國是之搖動贈申王謚忠獻檜居相位十九年倡和
誤國忘讐戮倫包藏禍心劫制君父陰結內侍及醫師
王繼先伺上微旨動靜必具知之郡國事惟申省無至
上前者性陰險深阻如崖窅不可測同列論事上前未
嘗力辨但以一二語傾擠之俾帝自怒一時忠臣良將
誅鋤略盡其頑鈍無恥者率為檜用爭以誣陷善類為
功凡無罪可狀者則曰立黨沽名曰訛謗曰指斥甚則

曰有無君心章疏皆檜自操以授言官識之者曰此老
秦筆也晚年殘忍尤甚屢興大獄察事之卒布滿京城
稍議之者即捕治中以深文如知饒州洪興祖作程瑀
論語解序引不使大臣怨乎不以即以為譏已毀其板
編管興祖于昭州京西運副魏安行嘗為鏤梓亦編管
于欽州其羅織人類此執政惟取備員甫入輒出惟深
德王次翁歷四年始出之立久任之說士淹滯失職有
十年不解者然附之則立與擢用開門受賂富敵于國

外國珍寶死猶及門檜每事與帝爭勝曹筠云水漲詔
逐之檜陞為從官周葵欲言梁汝嘉檜不待帝言即改
除之由是張扶請檜乘金根車呂愿中獻秦城王氣詩
其勢漸不可制檜既死帝謂楊存忠曰朕今日始免防
檜逆謀矣 朱熹曰紹興初賢才並用紀綱復張諸將
屢以捷告恢復之勢蓋十八九金人於是始露和議以
沮吾計而宰相秦檜歸自邊庭獨以長樂梓宮藉口攘
却衆謀熒惑主聽使和議翕然以定而不可破士大夫

狃于積衰之俗見國家無事而檜與其徒皆享成功無後患顧以忘仇忍辱為事理之當然嗚呼始則唱邪謀以誤國中則挾敵勢以要君使人倫不明人心不正而未流之弊遺君後親無所不至此檜之罪所以上通于天萬死不足贖也

韓侂胄謀預政數詣都堂留正使省吏諭之曰此非知閭日往來之地侂胄怒而退會正與趙汝愚議攢宮不合侂胄因間之于光宗遂以手詔罷正出知建康府正

謹法度惜名器毫髮不可干以私與周必大俱以相業稱

陳自強嘗為韓侂胄童子師及侂胄當國自強入都待銓欲見之無以自通僦居主人出入侂胄家為入言之一日侂胄召自強比至則從官畢集侂胄設褥于堂延自強升坐再拜次召從官同坐從官踧踏莫敢居上者侂胄徐曰陳先生老儒汨沒可憇坐客唯唯明日交章薦其才即除太學錄未踰年三遷為秘書郎既入館即

改右正言月餘拜諫議大夫御史中丞旬日遂秉政
自兵興以來蜀口漢淮之民死於兵戈者不可勝計公
私之力大屈而韓侂胄意猶未已中外憂懼禮部侍郎
兼資善堂翊善史彌遠入對因力陳危迫之勢請誅侂
胄以安邦皇后楊氏素怨侂胄使皇子榮王曦具疏言
侂胄再啓兵端將不利於社稷帝不答后從旁力贊之
帝猶未許后請命其兄楊次山擇羣臣可任者與共圖
之帝始允可次山遂語彌遠彌遠得密旨以錢象祖嘗

諫用兵忤侂胄乃先白象祖象祖許之象祖以告李壁
彌遠自懷中出御筆批云韓侂胄久任國柄輕啓兵端
使南北生靈枉罹凶害可罷平章軍國事陳自強阿附
充位可罷右丞相日下出國門仍命主管殿前司公事
夏震以兵三百防護象祖欲奏審壁謂事留恐泄乃已
翌日侂胄入朝至太廟前震呵止之從者皆散震以兵
擁侂胄至玉津園側殛殺之彌遠象祖以誅侂胄聞帝
不信越三日猶以為未死後審其果然遂下詔暴侂胄

罪惡于中外蓋其謀始于彌遠而成于皇后及楊次山
帝初無意也論功進彌遠為禮部尚書加震福州觀察
使侂胄專政十四年宰執侍從臺諫藩臬皆其門庶之
人天子孤立于上威行宮省權震宇內嘗鑿山為沼下
瞰太廟出入宮闈無度孝宗疇昔思政之所偃然居之
老宮人見之往往垂涕顏棧草制以為得聖之清易拔
撰答詔以元聖褒之四方投獻者謂伊霍旦奭不足以
擬其勲余嘉請加九錫趙師弄乞置平原郡王府官屬

侂胄皆當之不辭其嬖妾皆封郡國夫人每內宴與妃嬪雜坐恃勢驕倨掖庭皆惡之及藉其家多乘輿服御之飾其僭紊極矣

史彌遠拜左相一日以疾求解政詔彌遠有定策大功勤勞王室宜加優禮於是受保寧昭信節度使克醴泉觀使封會稽郡王奉朝請二子一婿五孫皆加官秩越八日而卒彌遠為相凡二十六年用事專且久權傾內外初欲反韓侂胄所為故收召賢才老成布於朝廷及

濟王不得其死論者紛起遂專任愷壬以居臺
諫一時君子貶斥殆盡理宗德其立己惟言是
從故恩寵終其身

賈似道上疏乞歸養度宗命大臣侍從傳旨留
日四五至中使加賜日十數至夜即交卧第外
以守之特授平章軍國重事一月三赴經筵三
日一朝治事都堂賜第西湖之葛嶺使迎養其
中似道於是五日一乘湖船入朝不赴都堂治

事吏抱文書就第呈署大小朝政一切決于館客廖瑩中堂吏翁應龍宰執充位而已似道雖深居簡出凡臺諫彈劾諸司薦辟及京尹畿漕一切事不關白不敢行正人端士斥罷殆盡吏爭納賂求美職圖為帥閫監司郡守者貢獻不可勝計一時貪風大肆兵喪於外匿不以聞民怨於下誅責無藝莫敢言者太府寺主簿陳蒙嘗入對極言似道為相國政

闕失後為淮東總領似道誣以貪汙安置于建昌軍籍錄其家

似道屢稱疾求去帝至涕泣留之不從詔六日一朝一月兩赴經筵尋又詔入朝不拜朝退帝必起避席日送之出殿廷始坐繼復詔十日一朝時襄樊圍急似道日坐葛嶺起樓閣亭榭作半間堂延羽流塑已像其中取宮人葉氏及娼尼有美色者為妾日肆淫樂與故博徒縱博人

無敢窺其第者有妾兄來立府門若將入狀似道見之縛投火中嘗與羣妾踞地鬪蟋蟀所狎客戲之曰此軍國重事耶酷嗜寶玩建多寶閣一日一登玩聞余玠有玉帶求之已徇葬矣發其塚取之人有物求不與輒得罪自是或累月不朝雖朝享景靈宮亦不從駕有言邊事者輒加駭斥一日帝問曰襄陽之圍已三年矣奈何似道對曰北兵已退陛下何從得此言帝曰適

有女嬪言之似道詰其人誣以他事賜死由是
邊事雖日急無敢言者

元仁宗時特們德爾再入相恃勢貪虐荒穢滋
甚中外切齒羣臣不知所為平章政事蕭拜住
稍牽制之中丞楊多爾濟慨然以糾正其罪為
已任上都富民張弼殺人繫獄特們德爾使嘉
努魯留守賀勝使出之勝不可多爾濟庶得特
們得爾受弼賂鉅萬計乃與拜珠及勝奏之而

內外御史凡四十餘人共劾其桀黠姦貪欺上
罔下占據晉王田及衛兵牧地竊食郊廟供祀
馬受諸王人等珍玉之賄動以萬計誤國之罪
又在僧格阿哈瑪特之上四海嫉憤咸願車裂
斬首以快人心奏上帝震怒特們德爾懼逃匿
太后宮多爾濟持之益急太后召多爾濟責之
帝不忍傷太后意但罷其相位而遷多爾濟為
集賢學士

除奸 三十一則

孔子為魯司寇七日而誅少正卯于東觀之下門人聞之趨而進至者不言其意皆一也子貢後至趨而進曰夫少正卯者魯之聞人矣夫子始為政何以先誅之孔子曰賜也非爾所及也夫王者之誅有五而盜竊不與焉一曰心辨而險二曰言偽而辯三曰行辟而堅四曰志愚而博五曰順非而澤此五者皆有辨知聰達之名而非其真也苟行以偽則其智足以移矣強足以獨立

此姦人之雄也不可誅夫有五者之一則不免于誅
今少正卯兼之是以先誅之也昔者湯誅蠋沫太公誅
潘趾管仲誅史附里子產誅鄧析此五子未有不誅也
所謂誅之者非謂其晝則攻盜暮則穿窬也皆傾覆之
徒也此固君子之所疑愚者之所惑也詩云憂心悄悄
愠于羣小此之謂矣

韓非備內篇 人主之患在於信人信人則制於人人
臣之於其君非有骨肉之親也縛於勢而不得不事也

故為人臣者窺覘其君心也無須臾之休而人主怠傲處其上此世所以有劫君弑主也為人主而大信其子則姦臣得乘於子以成其私故李兌傳趙王而餓主父為人主而大信其妻則姦臣得乘於妻以成其私故優施傳麗姬殺申生而立奚齊夫以妻之近與子之親而猶不可信則其餘無可信者矣且萬乘之主千乘之君后妃夫人適為太子者或有欲其君之蚤死者何以知其然夫妻者非有骨肉之恩也愛則親不愛則踈語曰

其母好者其子抱然則其為之反也其母惡者其子釋
大夫年五十而好色未解也婦人年三十而美色衰矣
以衰美之婦人事好色之丈夫則身見疎賤其子疑不
為主此后妃夫人之所以冀其君之死者也唯母為后
而子為主則令無不行禁無不止男女之樂不減於先
君而擅萬乘不疑此酖毒扼昧之所以用也故桃左春
秋曰人主之疾死者不能處半人主弗知則亂多資故
曰利君死者衆則人主危故王良愛馬越王勾踐愛人

為戰與馳醫善吮人之傷舍人之血非骨肉之親也利所加也故與人成輿則欲人之富貴匠人成棺則欲人之夭死也非與人仁而匠人賊也不貴則輿不售人不死則棺不買情非憎人也利在人之死也故后妃夫人太子之黨成而欲君之死也君不死則勢不重情非憎君也利在君之死也故人主不可以不加心於利已死者故日月暈圍於外其賊在內備其所憎禍在所愛是故明主不舉不叅之事不食非常之食遠聽而近視

以審外內之失省同異之言以知朋黨之分偶叅伍之
驗以責陳言之實執後以應前按法以治衆衆端以叅
觀士無幸賞賞無踰行殺必當罪有罪不赦則姦邪無
所容其私矣徭役多則民苦民苦則權勢起權勢起則
復除重復除重則貴人富苦民以富貴人起勢以藉人
臣非天下長利也故曰徭役少則民安民安則下無重
權下無重權則權勢滅權勢滅則德在上矣今夫水之
勝火亦明矣然而釜鬲間之水煎沸竭盡其上而火得

熾盛焚其下水失其所以勝者矣今夫治之禁姦未明於此然守法之臣為釜鬲之行則法獨明於胸中而已失其所以禁姦者矣上古之傳言春秋所記犯法為逆以成大姦者未嘗不從尊貴之臣也而法令之所以備刑罰之所以誅常於卑賤是以其民絕望無所告愬大臣比周蔽上為一陰相善而陽相惡以示無私相為耳目以候主隙人主掩蔽無道得聞有主名而無實臣專法而行之周天子是也偏借其權勢則上下易位矣此

言人臣之不可借權勢也

漢周紆上和帝請誅寶瓌疏 臣聞臧文仲之事君也

見有禮于君者事之如孝子之養父母見無禮于君者誅之如鷹鷂之逐鳥雀按夏陽侯瓌本出輕薄志在邪辟學無經術而妄構講舍外招儒徒實會奸桀輕忽天威侮慢王室又造作巡狩封禪之書惑衆不道當伏誅戮而主者營私不為國計夫涓流雖寡浸成江河燭火雖微卒能燎野履霜有漸可不懲革宜尋呂產專竊之

亂永惟王莽篡逆之禍上安社稷之計下解萬夫之感
靈帝乳母趙嬈旦夕在太后側中常侍曹節與共交構
諂事太后數出詔命有所封拜及其支類多行貪虐陳
蕃疾之志誅中官會竇武亦有謀蕃自以既從人望而
德於太后必謂其志可申乃先上訴 臣聞言不直而
行不正則為欺乎天而負乎人危言極意則羣凶側目
禍不旋踵鈞此二者臣寧得禍不敢欺天也今京師囂
囂道路諠譁言侯覽曹節公乘昕王甫鄭颺等與趙夫

人諸女尚書並亂天下附從者升進忤逆者中傷方今一朝羣臣如河中木耳汎汎東西耽祿畏害陛下前始攝位順天行誅蘇康管霸並伏其辜是時天地清明人鬼歡喜奈何數月復縱左右元惡大姦莫此之甚今不急誅必生變亂傾危社稷其禍難量願出臣章宣示左右并令天下諸姦知臣疾之

唐高宗時李義府恃寵用事洛州婦人淳于氏美色繫大理獄義府屬大理丞畢正義枉法黜之將納為妾事

覺義府逼正義自縊以減口上知而不問侍御史王義方欲奏彈之先白其母曰義方為御史視奸臣不糾則不忠糾之則身危而憂及于親為不孝奈何母曰昔王陵之母殺身以成子之名汝能盡忠以事君吾死不恨義方乃奏曰義府擅殺六品寺丞就云自殺亦由畏義府威殺身以減口如此則生殺之威不由上出漸不可長對仗叱義府令下義府顧望不退義方乃三叱義府始趨出義方乃讀彈文上以義方毀辱大臣貶之

驃騎大將軍程元振專權自恣人畏之甚於李輔國諸將有大功者元振皆忌疾欲害之吐蕃入寇元振不以時奏至代宗狼狽出幸發詔徵諸道兵李光弼等皆忌元振居中莫有至者中外咸切齒而莫敢發言太常博士柳伉上疏以為犬戎犯關度隴不血刃而入京師劫宮闈焚陵寢武士無一人力戰者此將帥叛陛下也陛下疏元功委近習日引月長成大禍羣臣在廷無一人犯顏回慮者此公卿叛陛下也陛下始出都百姓填

然奪府庫相殺戮此三輔叛陛下也自十月朔召諸道
兵盡四十日無隻輪入關此四方叛陛下也內外離叛
陛下以今日之勢為安邪危邪若以為危豈得高枕不
為天下討罪人乎必欲存宗廟社稷獨斬元振首馳告
天下悉出內使隸諸州持神策兵付大臣然後削尊號
下詔引咎曰天下其許朕自新改過宜即募士西赴朝
廷若以朕惡未悛則帝王大器敢妨聖賢其聽天下所
往如此而兵不至人不感天下不服臣請闔門寸斬以

謝陛下代宗以元振有保護功削其官爵放歸田里
元載專權恐奏事者攻訐其私乃請百官凡論事皆先
白長官長官白宰相然後奏聞仍以上旨諭百官曰比
日諸司奏事煩多所言多讒毀故委長官宰相先定其
可否刑部尚書顏真卿上疏以為郎官御史陛下之耳
目今使論事者先白宰相是自掩其耳目也太宗著司
門式云其無門籍人有急奏者皆令門司與仗家引奏
無得關礙所以防壅蔽也天寶以後李林甫為相深疾

言者道路以目上意不下逮下情不上達蒙蔽喑鳴
卒成幸蜀之禍陵夷至于今日其所從來者漸矣昔林
甫雖擅權羣臣有不諾宰相輒奏事者則託以它事陰
中傷之猶不敢明令百司奏事皆先白宰相也陛下儻
不早寤漸成孤立後雖悔亦無及矣載聞而恨之奏真
卿誹謗貶峽州別駕

新州司馬盧杞遇赦移吉州長史謂人曰吾必再入未
幾德宗果用為饒州刺史給事中袁高應草制執以白

盧翰劉從一曰盧杞作相致鑿輿播遷海內瘡痍奈何
遽遷大郡願相公執奏翰等不從更命它舍人草制制
出高執之不下且奏杞極惡窮凶百辟疾之若讐六軍
思食其肉何可復用德宗不聽補闕陳京趙需等上疏
曰杞三年擅權百揆失敘天地神祇所知華夏蠻夷同
棄儻加巨姦之寵必失萬姓之心袁高復於正牙論奏
德宗曰杞已再更赦高曰赦者止原其罪不可為刺史
陳京等亦爭之不已曰杞之執政百官常如兵在其頸

今復用之則姦黨皆唾掌而起德宗大怒左右辟易諫者稍引却京顧曰趙需等勿退此國大事當以死爭之德宗謂宰相與杞小州刺史可乎李勉曰陛下欲與之雖大州亦可其如天下失望何遂以杞為澧州別駕使謂袁高曰朕徐思卿言誠為至當又謂李泌曰朕已可袁高所奏泌曰累日外人竊議比陛下於桓靈今承德音乃堯舜之不逮也德宗悅杞竟卒於澧州

陸贄以德宗知待之厚事有不可常力爭之所親或規

其太銳贄曰吾上不負天子下不負所學它無所恤裴延齡日短贄於德宗趙憬之入相也贄實引之既而有憾於贄密以贄所譏彈延齡事告延齡故延齡益得以為計德宗由是信延齡而不直贄與憬約至上前極論延齡姦邪德宗怒形於色憬默而無言贄罷為太子賓客

德宗欲修神龍寺須五十尺松不可得裴延齡曰臣近見同州一谷木數千株皆可八十尺德宗曰開元天寶

間求美材於近畿猶不可得今安得有之對曰天生珍
材固待聖君乃出開元天寶何從得之延齡奏左藏庫
司多有失落近因檢閱使置簿書乃於糞土之中得銀
十三萬兩其匹段雜貨百萬有餘此皆已棄之物即是
羨餘悉應移入雜庫以供別勅支用太府少卿韋少華
不伏抗表稱此皆每月申奏見在之物請加推驗執政
請令三司詳覆德宗不許亦不罪少華延齡每奏對恣
為詭譎皆衆所不敢言亦未嘗聞者延齡處之不疑德

宗亦頗知其誕妄但以其好詆毀人冀聞外事故親厚之羣臣畏延齡有寵莫敢言惟鹽鐵轉運使張滂京兆尹李充司農卿李銛以職事相關時證其妄而陸贄獨以身當之日陳其不可用贄上書極陳延齡奸詐數其罪惡其略曰延齡以聚斂為長策以詭妄為嘉謀以捃尅斂怨為匪躬以靖譖服讒為盡節總典籍之所惡以為志術冒聖哲之所戒以為行能可謂堯代之共工魯邦之少卯也跡其姦蠹日長月滋陰祕者固未盡彰敗

露者猶難悉數又曰陛下姑欲保持曾無詰問延齡謂能蔽惑不復懼思移東就西便為課績取此適彼遂號羨餘愚弄朝廷有同兒戲又曰矯詭之態誣罔之辭遇事輒行應口便發昔趙高指鹿為馬臣謂鹿之與馬物類猶同豈若延齡掩有為無指無為有臣以卑鄙任當台衡情激于衷雖欲罷而不能自默也書奏德宗不悅待延齡益厚

翰林學士元稹與知樞密魏弘簡深相結求為宰相由

是有寵於穆宗每事咨訪焉積無怨於裴度但以度先
達重望恐其復有功大用妨已進取故度所奏畫軍事
多與弘簡從中沮壞之度乃上表極陳其朋比奸蠹之
狀以為逆豎構亂震驚山東姦臣作朋撓敗國政陛下
欲掃蕩幽鎮先宜肅清朝廷何者為患有大小議事有
先後河朔逆賊祗亂山東禁圍姦臣必亂天下是則河
朔患小禁圍患大小者臣與諸將必能剪滅大者非陛
下覺寤制斷無以驅除臣自兵興以來所陳章疏事皆

要切所奉書詔多有參差蒙陛下委付之意不輕遭姦臣抑損之事不少臣素與佞倖亦無讐嫌正以臣前請乘傳詣闕面陳軍事姦臣最所畏憚恐臣發其過惡百計止臣臣又請與諸軍齊進隨便攻討姦臣恐臣或有成功曲加阻礙逗遛日時進退皆受羈牽意見悉遭蔽塞但欲令臣失所臣無成則天下理亂山東勝負悉不顧矣為臣事君一至於此若朝中姦臣盡去則河朔逆賊不討自平若奸臣尚存則逆賊縱平無益陛下倘未

信臣言乞出臣表使百官集議彼不受責臣當伏辜表
三上穆宗雖不悅以度大臣不得已以弘簡為弓箭庫
使頽為工部侍郎

宋真宗時丁謂為山陵使雷允恭為都監判司天監邢
中和言于允恭曰今山陵上百步法宜子孫類汝州秦
王墳但恐下有石與水耳允恭曰上無他子若如秦王
墳何不可中和曰山陵事重踏行覆按動經月日恐不
及七月之期耳允恭曰第移就上穴我走馬入見太后

言之允恭素貴橫人不敢違即改穿上穴乃入白太后
曰此大事何輕易如此允恭曰使先帝宜子孫何為不
可太后意不然曰出與山陵使議可否允恭出與謂言
謂唯唯允恭入奏山陵使亦無異議遂命夏守恩領工
徒數萬穿地土石相半繼之以水衆議曰諠懼不能成
功中作而罷奏請待命謂庇允恭依違不決內侍毛昌
達自陵下還以其事聞詔問謂謂始請遣使按視既而
咸請復用舊地乃詔馮拯曹利用等就謂第議遣王曾

覆視曾還請獨對因言謂包藏禍心令允恭移皇堂於絕地太后大驚怒甚欲併誅謂馮拯進曰謂固有罪然帝新即位亟誅大臣駭天下耳目后怒稍解遂止誅允恭等二日太后召宰相諭曰丁謂為宰相乃與宦者交通謂前附允恭奏事皆言己與卿等定議故皆可之且營奉先帝陵寢而擅有遷易幾誤大事拯等對曰自先帝登遐政事皆謂與允恭同議稱得旨禁中臣等莫敢辨虛實賴聖神察其姦此宗社之福也任中正獨進曰

謂被先帝顧託雖有罪請如律議功曾曰謂以不忠得罪宗廟尚可議耶乃降授謂太子少保分司西京并罷中正出知鄆州故事黜宰相者降制時欲亟行止召舍人草詞仍榜朝堂而諭天下以拯為山陵使

章獻太后臨朝內侍任守忠與都知江德明等交通請謁權寵過盛累遷宣政使入內都知仁宗以未有儲嗣屬意于英宗守忠建議欲援立昏弱以邀大利及帝即位又乘帝疾交構兩宮知諫院司馬光論守忠離間之

罪國之大賊乞斬于都市呂誨亦上疏論之帝納其言翌日韓琦出空頭勅一道歐陽修已簽趙槩難之修曰第書之韓公必自有說既而琦坐政事堂召守忠立庭下曰汝罪當死遂責蘄州安置取空頭勅填與之即日押行琦意以為少緩則中變也其黨史昭錫等悉竄南方中外快之

唐垆以父任得官嘗上書言秦二世制于趙高乃失之弱非失之彊神宗悅其言又言青苗法不行宜斬大臣

異議如韓琦者數人王安石尤喜之薦使對賜進士出身為崇文校書安石復令鄧綰舉為御史遂除太子中允將用為諫官安石疑其輕脫將背己立名不除職以本官同知諫院非故事也垆果怒安石易已凡奏二十疏論時事皆留中不出垆乃因百官起居日叩陛請對帝令諭以他日垆伏地不起遂召升殿垆至御座前進曰臣所言皆大臣不法請對陛下一一陳之乃搢笏展疏目安石曰王安石近御座聽劄子安石遲遲垆訶曰

陛下前猶敢如此在外可知安石竦然而進坳大聲宣讀凡六十條大抵言安石專作威福曾布表裏擅權天下但知憚安石不復知有陛下文彥博馮京知而不敢言王珪曲事安石無異廝僕且讀且目珪珪慙懼俯首先降又言薛向陳繹安石頤指氣使無異家奴張璪李定為安石牙爪張商英乃安石鷹犬逆意者雖賢為不肖附己者雖不肖為賢至詆安石為李林甫盧杞帝屢止之坳慷慨自若略不退懾讀已下殿再拜而退侍臣

衛士相顧失色閣門糾其瀆亂朝儀貶潮州別駕

范鎮論陳執中疏 臣聞去年十二月熒惑犯房上相

未幾陳執中家決殺婢使議者以為天變應此臣切謂
不然執中再入為相未及二年變祖宗大樂墮朝廷典
故緣葬事除宰相除翰林學士除觀察使其餘僭賞不
可悉紀陛下罷內降五六年來政事清明近日稍復奉
行至有侍從臣僚之子亦求內降內臣無名超資改轉
月須數人又今天下民困政為兵多而益兵不已執中

身為首相議當論執而因循苟簡曾不建言天變之發實為此事陛下釋此不問御史又專治其私捨大責細臣恐雖退執中未當天變乞以臣章宣示御史然後降付學士草詔使天下之人知陛下退大臣不以其家事而以其職事後來執政不敢恤其家事而盡心於陛下職事

蘇洵辯姦論 事有必至理有固然惟天下之靜者乃能見微而知著月暈而風礎潤而雨人人知之人事之

推移理勢之相因其疎闊而難知變化而不可測者孰與天地陰陽之事而賢者有不知其故何也好惡亂其中而利害奪其外也昔者山巨源見王衍曰誤天下蒼生者必此人也郭汾陽見盧杞曰此人得志吾子孫無遺類矣自今而言之其理固有可見者以吾觀之王衍之為人容貌言語固有以欺世而盜名者然不伎不求與物浮沉使晉無惠帝僅得中主雖衍百千何從而亂天下乎盧杞之姦固足以敗國然不學無文容貌不足

以動人言語不足以眩世非德宗之鄙暗亦何從而用之由是言之二公之料二子亦容有未必然也今有人口誦孔老之言身履夷齊之行收召好名之士不得志之人相與造作言語私立名字以為顏淵孟軻復出而陰賊險狠與人異趣是王衍盧杞合而為一人也其禍豈可勝言哉夫面垢不忘洗衣垢不忘澣此人之至情也今也不然衣巨盧之衣食犬彘之食囚首喪面而談詩書此豈其情也哉凡事之不近人情者鮮不為大姦

慝豎刁易牙開方是也以蓋世之名而濟其未形之患
雖有願治之主好賢之相猶將舉而用之則其為天下
患必然而無疑者非特二子之比也孫子曰善用兵者
無赫赫之功使斯人而不用也則吾言為過而斯人有
不遇之歎孰知禍之至於此哉不然天下將被其禍而
吾獲知言之名悲夫

哲宗時呂惠卿見正人彙進知不容于時懇求散地右
司諫蘇轍王覲歷數其姦請投畀四裔以禦魑魅中丞

劉摯復列其五罪於是貶光祿卿分司南京再貶建寧軍節度副使建州安置時惠卿章惇呂嘉問鄧綰李定蒲宗孟范子淵等皆已斥外言者論之不已范純仁言于太后曰錄人之過不宜太深后然之乃詔前朝希合附會之人一無所問言者勿復彈劾惠卿黨稍安或謂公著曰今除惡不盡將貽後患公著曰治道去太甚耳文景之世網漏吞舟且人材實難宜使自新豈宜使自棄邪

蘇轍論呂惠卿疏 臣聞漢武帝世御史大夫張湯挾

持巧詐以迎合上意變亂貨幣崇長犴獄使天下重足而立幾至於亂武帝覺悟誅湯而後天下安唐德宗世宰相盧杞妬賢嫉能戕害善類力勸征伐助成暴斂使天下相率叛上至於流播德宗覺悟逐杞而後社稷復存蓋小人天賦傾邪安於不義性本陰賊尤喜害人若不死亡終必為患臣伏見前叅知政事呂惠卿懷張湯之辯詐兼盧杞之姦凶詭變多端敢行非度見利忘義

黷貨無厭王安石初任執政用之為腹心安石山野之人彊狠傲誕其於吏事冥無所知惠卿指擿教導以濟其惡青苗助役議出其手韓琦始言青苗之害先帝知其琦朴忠翻然感悟欲退安石而行琦言當時執政皆聞德音安石惶遽自失亦累表乞退天下欣然有息肩之望矣惠卿方為小官自知失勢上章乞對力進邪說熒惑聖聽巧回天意身為館殿攝行內侍之職親往傳宣以起安石肆其偽辯以難琦說仍為安石畫劫持上下

之策大率多用刑獄以震動天下自是諍臣吞聲有識
喪氣而天下靡然矣至於排擊忠良引用邪黨惠卿之
力十居八九其後又建手實簿法尺椽寸土檢括無遺
雞豚狗彘抄劄殆遍專用告訐推析毫毛鞭箠交下紙
筆翔貴小民怨苦甚於苗役又因保甲正長給散青苗
結甲赴官不遺一户上下騷動不安其生遂致河北人
戶流移雖上等富家有驅領車牛懷挾金銀流入襄鄧
者旋又興起大獄以恐脅士人如鄭俠王安國之徒僅

保首領而去原其害心本欲株連蔓引塗污公卿不止
如此獨賴先帝天姿仁聖每事裁抑故惠卿不得窮極
其惡不然安常守道之士無噍類矣既而惠卿自以賊
罪被黜於是力陳邊事以中上心其在延安始變軍制
雜用蕃漢上與馮京異論下與蔡延慶等力爭惟黨人
徐禧助之遂行其說違背物情壞亂邊政至今為患西
戎無變妄奏警急擅領大衆涉入虜境竟不見敵遷延
而歸糜費資糧棄捐戈甲以巨萬計恣行欺罔坦若無

人立石紀功使西戎曉然知朝廷有吞滅靈夏之意自是戎人怨畔邊鄙騷動河隴困竭海內疲勞永樂之敗大將徐禧本惠卿自布衣中保薦擢任始終協議遂付邊政敗聲始聞震動宸極循致不豫初實由此邊釁一生至今為梗及其移領河東大發人牛耕葭蘆吳堡兩寨生地托以重兵方敢布種投種而歸不敢復視及至秋成復以重兵防托收刈所得率皆秕稗雨中收獲即時腐爛惠卿張皇其數牒轉運司交割妄言可罷饋運

其實所費不貲而無絲毫之利邊臣畏憚皆不敢言此則惠卿立朝事迹一二雖復肆諸市朝不為過矣若其私行儉薄非人所為閭閻下賤有不食其餘者安石之於惠卿有卵翼之恩有父師之義方其求進則膠固為一更相汲引以欺朝廷及其權位既均勢力相軋反眼相噬化為讐敵始安石罷相以執政薦惠卿既已得位恐安石復用遂起王安國李士寧之獄以柅其歸安石覺之被召即起迭相攻擊期致死地安石之黨言惠卿

使華亭知縣張若濟借豪民朱華等錢買田產使舅鄭
膺請奪民田使僧文捷請奪天竺僧舍朝廷遣蹇周輔
推鞠其事獄將具而安石罷去故事不復究案在御史
可覆視也惠卿言安石相與為姦發其私書其一曰無
使齊年知齊年者馮京也京安石皆生於辛酉故謂之齊
年先帝猶薄其罪惠卿復發其一曰無使上知安石由
是得罪夫惠卿與安石出肝肺託妻子平居相結惟恐
不深故雖欺君之言見於尺牘不復疑問惠卿方其無

事已一一收錄以備緩急之用一旦爭利遂相扶擿不遺餘力必致之死此犬彘之所不為而惠卿為之曾不愧恥天下之士見其在位側目畏之夫人君用人欲其忠信於己必取信於父兄信於師友然後付之以事故放廢違命也而推其仁則可以托國食子徇君也而推其忍則至於弑君樂布惟不廢彭城之命故高祖知其賢李勣惟不利李密之地故太宗許其義二人終事二主俱為名臣者仁心所存無施不可雖公私有異而忠

厚不殊至於呂布事丁原則殺丁原事董卓則殺董卓
劉牢之事王恭則反王恭事司馬元顯則反元顯背逆
人理世所共疑故呂布見誅於曹公而牢之見殺於桓
氏皆以其平生反覆勢不可存夫曹桓古之姦雄駕御
英豪何所不有然推究利害終畏此人今朝廷選用忠
信惟恐不及而置惠卿於其間譬如薰蕕雜處梟鸞並
棲不惟勢不兩立兼亦惡者必勝况自去歲以來朝廷
廢吳居厚呂嘉問蹇周輔朱用臣李憲王中正等或以

牟利或以黷兵一事害民皆不得逃譴今惠卿身兼衆惡自知罪大而欲以間地自免天下公議未肯赦之然近日言事之官論奏姦邪至於鄧綰李定之徒微細必舉而不及惠卿者蓋其凶悍猜忍如蝮蝎萬一復用睚眦必報是以言者未肯輕發臣愚竊寡慮以為備位言責與元惡同時而畏避隱忍辜負朝廷是以不憚死亡獻此愚直伏乞陛下斷自聖意略正典刑縱未以汙鉢鑽猶當追削官職投畀四裔以禦魑魅

蔡確失勢日久遂懷怨望在安州嘗遊車盖亭賦詩十章知漢陽軍吳處厚與確有隙上之以為皆涉譏訕其用郝處俊上元間諫高宗欲傳位武后事以斥東朝語尤切害於是臺諫言確怨謗乞正其罪詔確具析確自辨甚悉右正言劉安世等又言確罪狀著明何待具析此乃大臣委曲為之地耳乃貶確光祿卿分司南京臺諫論之不置而諫議大夫范祖禹亦言確之罪惡天下不容尚以列卿分務留都未厭衆論執政議寘確于法

范純仁王存獨以為不可力爭之文彥博欲貶確嶺嶠
純仁聞之謂呂大防曰此路自乾興以來荆棘近七十
年吾輩開之恐自不免大防遂不敢言越六日再貶確
英州別駕新州安置純仁又言于太后曰聖朝宜務寬
厚不可以語言文字之間曖昧不明之過竄誅大臣今
舉動宜為將來法此事甚不可開端也且以重刑除惡
如以猛藥治病其過也不能無損焉不聽時中丞李常
中書舍人彭汝礪侍御史盛陶皆諫不可罪確悉貶遠

州確至新州未幾卒初確之具析未上也梁燾自路州
召為諫議大夫過河陽邢恕極論確有策立勲燾至奏
之太后諭三省曰帝是先帝長子子繼父業其分當然
確有何策立勲耶若使確他日復來欺罔上下豈不為
朝廷害恐帝年少制御不得故今因其自敗如此行遣
蓋為社稷也

蔡京深結中官裴彥臣常安民因論之謂京姦足以惑
衆辨足以飾非巧足以移奪人主之視聽力足以顛倒

天下之是否內結中官外連朝士一不附已則誣以黨於元祐非先帝法必擠之而後已今在朝之臣京黨過半陛下不可不早覺悟而逐之他日羽翼成就悔無及矣是時京之姦始萌芽人多未測獨安民首發之又言今大臣為紹述之說皆借此名以報復私怨朋附之流遂從而和之張商英在元祐時上呂公著詩求進諛佞無恥近乃乞毀司馬光及公著神道碑周秩為博士親定光謚為文正近乃乞斷棺鞭尸陛下察此輩之言果

出於公論乎章疏前後至數十百上度終不能回遂丐
外哲宗慰勉而已至是復論章惇頡國植黨乞收主柄
而抑其權反復曲折言之不置惇遣所親信語之曰君
本以文學聞于時奈何以言語自任與人為怨少安靜
當以左右相處安民正色斥之曰爾乃為時相游說邪
惇益怒至是御史董敦逸論安民黨于蘇軾兄弟會安
民言事忤旨惇遂出安民監滁州酒稅安燾救之不克
日食詔求直言筠州推官崔鷗上書曰毀譽者朝廷之

公議故責授朱厓軍司戶司馬光左右以為姦而天下皆曰忠今宰相章惇左右以為忠而天下皆曰姦此何理也夫乘時抵巇以盜富貴探微揣端以固權寵謂之姦可也包苴滿門私謁踵路陰交不逞密結禁庭謂之姦可也以竒伎淫巧蕩上心以倡優女色敗君德獨操賞刑自報恩怨謂之姦可也蔽遮主聽排斥正人微言者坐以刺譏直諫者陷以指斥以杜天下之言掩滔天之罪謂之姦可也凡此數者先有之乎惇有之乎賞繆

罰濫佞人猶佯如此而國不亂未之有也小人譬之蝮
蝎其兇忍害人根乎天性隨遇必發天下無事不過賊
陷忠良破碎善類至緩急危疑之際必有反覆賣國跋
扈不臣之心比年以來諫官不論得失御史不劾姦邪
門下不駁詔令共持暗默以為得計夫以股肱耳目治
亂安危所繫而一切若此陛下雖有堯舜之聰明將誰
使之誰使行之夫四月陽極盛陰極衰之時而陰干
陽故其變為大惟陛下畏天威聽明命大運乾剛大明

邪正則天意解矣若夫伐鼓用幣素服撤樂而無脩德善政之實非所以應天也哲宗覽而善之以為相州教授蔡卞專托紹述之說上欺天子下脅同列凡中傷善類皆密疏建白然後請哲宗親札付外行之章惇雖巨姦然猶在其術中惇輕率不思而卞深阻寡言論議之際惇毅然主持卞或噤不啓齒一時論者以為惇迹易明卞心難見至是龔夬論惇卞之惡大略以為昔日丁謂當國號為恣雖然不過陷一寇準而已及惇則故老

元輔侍從臺省之臣凡天下之所謂賢者一日之間布滿嶺海自有宋以來未之聞也當是時惇之威勢震於海內此陛下所親見蓋其立造不根之語文致惇逆之罪是以人人危懼莫能自保俾其朽骨銜冤于地下子孫禁錮于炎荒忠臣義士憤悶而不敢言海內之人得以歸怨先帝其罪如此尚何俟而不正典刑哉卞事上不忠懷姦深阻凡惇所為皆卞發之為力居多望采之至公昭示譴黜未報而臺諫陳師錫陳次升陳瓘任伯

兩張庭堅等極論卞罪浮于惇乞正典刑以謝天下乃
出知江寧臺諫論之不已遂以祕書少監分司池州

方軫上書言蔡京睥睨社稷內懷不道專以紹述熙豐
之說為自媒之計內而執政侍從外而帥臣監司無非
其門人親戚京每有奏請盡作御筆行出語人曰此上
意也明日不行又語人曰京實啓之也善則稱已過則
稱君必欲陛下歛天下之怨而後已自元符末陛下嗣
服忠義之士投匭者無日無之京分為邪等黥配編置

不齒仕籍則誰肯為陛下言哉京又使子攸日以花石禽鳥為獻欲愚陛下使不知天下治亂臣以為京必反也請誅京詔宣示京京請下軫獄竟流嶺南

王黼聞金兵至不俟命載其孥以東詔賤為崇信軍節度副使永州安置吳敏李綱請誅黼事下開封尹聶昌昌遣武士躡及於雍丘南戕之民家取其首以獻欽宗以初即位難於誅大臣託言為盜所殺李彥賜死並籍其家朱勔放歸田里勔以花石取媚流毒州郡者踰二

十年積官至寧遠軍節度使居蘇州公肆培克其園地
擬禁蘗服飾器用上僭乘輿又託輓舟募兵數千人擁
以自衛聲燄薰灼東南部刺史郡守多出其門邪人穢
夫候門奴事時謂東南小朝廷上皇末年益親任之居
中白事傳達上旨大略如內侍進見不避宮嬪一門盡
為顯官駟僕亦至金紫天下為之扼腕至是凡由勳得
官者皆罷

蔡京再貶崇信軍節度副使童貫再貶昭化軍節度副

使至是復竄京于儋州其子孫二十三人分竄遠地遇赦不許量移竄貫于吉陽軍趙良嗣于柳州詔下十日京死于潭州朝廷遣御史張徵誅貫轉運副使李昇之誅良嗣于貶所函首赴闕梟于市京天資凶譎舞智御人在人主前顛狙伺為固位計帝亦知其姦屢罷屢起且擇京不合者執政以柅之京每聞將退免輒入見祈哀蒲伏叩頭無復廉恥見利忘義至於兄弟父子自為秦越暮年即家為府營進之徒集門輸貨僮隸皆得美

官棄紀綱法度為虛器根株連結牢不可破卒致宗廟之禍雖以謫死天下猶以不正典刑為恨貫握兵二十年權傾一時奔走期會過于制物嘗有論其過者詔方劾往察劾一動一息貫悉偵得之先密以白且陷以他事劾反得罪遂死貫狀魁梧偉瞻視頤下生鬚十數皮骨勁如鐵不類常人有度量能疎財後宮自妃嬪以下皆獻餉結納左右婦寺譽言日聞寵煥翕赫庭戶雜選成市岳牧輔弼多出其門窮姦稔禍流毒四海死不足以償責

呂祖泰祖儉從弟也性疏遠尚氣誼論世事無忌諱先是祖儉以言事貶祖泰語其友曰自吾兄之貶諸人箝口我雖無位義必以言報國當少須之今亦未敢以累吾兄也至是祖儉卒祖泰乃擊登聞鼓上書光宗論韓侂胄有無君之心請誅之以防禍亂其略曰道學自古所恃以為國者也丞相趙汝愚今之有大勲勞者也立偽學之禁逐汝愚之黨是將空陛下之國而陛下不知悟耶陳自強侂胄童稚之師躐致宰輔陛下舊

學之臣彭龜年等今安在邪蘇師旦平江之吏胥周筠
韓氏之廝役人人知之今師旦以潛邸隨龍筠以皇后
親屬俱得大官不知陛下在潛邸時果識師旦乎椒房
之親果有筠乎侂冑徒自尊大而卑陵朝廷一至於此
願亟誅侂冑師旦筠而遂罷自強之徒故大臣在者獨
周必大可用宜以代之不然事將不測書出中外大駭
有旨呂祖泰挾私上書語言狂妄拘管連州右諫議大
夫程松與祖泰狎友懼曰人知我素與遊其謂我與聞

乎乃獨奏言祖泰有當誅之罪且其上書必有教之者
今縱不殺猶當杖黥竄之遠方殿中侍御史陳謹亦以
為言乃杖祖泰一百配欽州牢城收管祖泰自期必死
冀以身悟朝廷了無懼色既至府尹為好語誘之曰誰
教汝共為章試言之吾且置汝祖泰笑曰公何問之愚
也吾固知必死而可受教於人且與人議之乎尹曰汝
病風喪心邪祖泰曰以吾觀之若今之附韓氏得美官
者乃病風喪心耳祖泰既得罪監察御史林采言偽習

之成造端自周必大宜加黜削施康年亦言必大首倡
偽徒私植黨與遂貶必大為少保

理宗時蒙古侵軼日甚丁大全當國匿不以聞遂罷相
以觀文殿大學士判鎮江府中書舍人洪芹繳言大全
鬼域之資穿窬之行引用凶惡陷害忠良遏塞言路濁
亂朝綱乞追官遠竄以伸國法御史朱貔孫等相繼論
大全姦回險狡狼害貪殘假陛下之刑威以箝天下之
口挾陛下之爵祿以籠天下之財饒虎臣又論其絕言

路壞人才竭民力誤邊防四罪詔守中奉大夫致仕

賈似道既免三學生及臺諫侍從皆上疏乞誅似道太
皇太后不許及似道上表自劾且言為夏貴孫虎臣所
誤乞保餘生有旨令李庭芝津遣歸越以終喪制似道
留揚不還王爚復論似道既不死忠又不成孝乞下詔
切責似道得詔乃還紹興府紹興守臣閉城不納王爚
復言于太后曰本朝權臣稔禍未有如似道之烈者縉
紳茅草不知幾疏陛下皆抑而不行付人言于不恤何

以謝天下太后乃降似道三官婺州居住婺人聞似道
至率衆為露布逐之復詔徙于建寧府斬翁應龍籍其
家廖瑩中王庭除名流之嶺南皆自殺於是御史孫嶸
叟等又以似道罪重罰輕乞斬之以正法方回復上疏
論似道僥詐貪淫褊驕吝專忍謬十罪太皇太后猶不
聽翁合上言似道以妬賢無比之林甫輒自託於伊周
以不學無術之霍光敢效尤於莽操其總權罔上賣國
名兵專利虐民滔天之罪人人能言迫於衆怒僅謫建

寧夫建寧實朱熹講道之闕里雖三尺童子亦知向方
聞似道名咸欲嘔唾况見其面乎乞遠移荒昧以禦魑
魅遂詔責授高州團練副使循州安置籍其家遣使監
押之貶所會稽縣尉鄭虎臣以其父嘗為似道所配欲
報之欣然請行似道時寓建寧之開元寺侍妾尚數十
人虎臣至悉屏去撤轎蓋暴行秋日中令舁轎夫唱杭
州歌謔之每名斥似道窘辱備至一日入古寺壁上有
吳潛南行所題字虎臣呼似道曰賈團練吳丞相何以

至此似道慙不能對至泉州洛陽橋遇葉季自漳州放還見于客邸李賦詞贈之似道俯首謝焉

元世祖時天下以僧格鈞考錢穀之故中外騷動廷臣莫敢言者集賢直學士趙孟頫謂奉御徹爾僧格罪惡甚矣我等不言他日何以辭其責公為上所親信捐一旦之命為萬姓除殘賊仁者事也時帝畋鄆北徹爾乘間入言之詞語激烈帝怒謂其毀詆大臣命衛士批其頰血湧口鼻委頓地上少間復呼而問之辯愈力曰臣與僧格無

讐言所以力數其罪而不顧身者正為國家計耳苟畏聖怒而不言則姦臣何時除民害何時息帝大悟召布呼珠問之對曰僧格壅蔽聰明紊亂朝政有言者即誣殺之今百姓失業盜賊蜂起召亂在旦夕非亟誅之恐為陛下憂時廷臣言者益衆遂詔臺省相與辯駁之僧格辭屈帝曰僧格為惡始終四年臺臣豈不知之知而不言當得何罪御史杜思敬曰奪官追俸惟上所裁遂斥罷臺臣之久任者免僧格等官命徹爾率衛士三百人

籍僧格家得珍寶如內藏之半阿爾根薩里以連坐亦籍其貲帝問僧格為政如此何故無一言對曰臣未嘗不言顧言不用耳葉李與僧格同事一無所匡正亦坐免久之得以疾請南還楊州學正李塗上言葉李本一黥徒方受上簡知即以舉僧格為第一事致以非罪誅貶大臣遣使四出鈎考錢穀民怨而盜發天怒而地震水災洊至人皆知僧格用羣小之罪而不知葉李舉僧格之罪宜斬李以謝天下書聞帝矍然曰朕素以葉李

剛介寧有是邪令召淦詣京師置對淦至而李已卒遂擢淦江陰路教授以旌其直

王著因人心憤怒阿哈瑪特密鑄大銅鎚與妖人高和尚謀擊殺之時皇太子從世祖如上都而阿哈瑪特留守京師著以太子素惡其姦乃遣二西僧至中書詐稱皇太子還都作佛事省中疑之時高觴張九思皆宿衛宮中詰之倉皇失對遂執之訊問不伏及午著復矯太子令俾樞密副使張易發兵夜會東宮易不察遽以兵往觴

問果何為易附耳語曰太子來誅左相也既而省中遣使出迎悉為偽太子所殺奪其馬入健德門夜二鼓至惠宮前立馬呼省官至前責阿哈瑪特數語著即牽去以所袖銅鉞碎其腦立斃繼呼郝鎮至殺之囚右丞張惠於是觴九思開門大呼曰此賊也叱衛士急捕之留守博敦持挺擊立馬者墜地衆斧漬多就擒高和尚逃去惟著挺身請囚時帝在察罕諾爾聞之即遣和爾果斯等歸討為亂者獲高和尚于高梁可梁王著張易皆棄

市著臨刑大呼曰王著為天下除害今死矣異日必有
為我書其事者復以張易從著為亂將傳首四方張九
思曰易應變不審則有之坐以與謀則過矣乞免傳首
從之王憚曰著激於義捐一身為天下除害事既露不
去自縛詣司敗以至臨命氣不少挫而視死如歸誠殺
身成名死而不悔者也律以春秋誅亂臣賊子之法不
以義與之可乎

巴延既誅唐其勢獨秉國鈞遂專權自恣變亂成憲虐

害天下漸有異謀順帝患之巴延欲以所養弟之子托克
托宿衛偵帝起居懼涉物議乃以知樞密院汪嘉努翰
林學士承旨實喇卜同侍禁近實屬意托克托故托克托政
令日修衛士拱聽約束巴延自領諸衛精兵以揚珠巴
哈為屏蔽導從之盛填溢街衢而帝儀衛反落落如晨
星勢焰熏灼天下之人知有巴延而已托克托深憂之私
請於父曼濟勒噶台伯父驕縱已甚萬一天子震怒則
吾族赤矣曷若於未敗圖之其父亦以為然托克托復質

於師吳直方直方曰傳有之大義滅親大夫但知忠於國爾餘復何顧焉一日見帝乘間自陳忘家徇國之意帝猶未之信時帝前後左右皆巴延之黨獨沙克嘉巴勒阿嚕為帝腹心乃遣二人與托克托遊日以忠義之言相與往復論辨益悉其心靡他遂聞于帝帝始信之無疑及巴延擅貶宣讓威順二王帝不勝其忿決意逐之一日泣語托克托克托亦泣下歸復與直方謀直方曰此大事故議論之際左右為誰曰阿嚕及托克托穆爾直方曰子之

伯父挾震主之威此輩苟利富貴其語一世則主危身
戮矣托克托乃延二人于家置酒張樂晝夜不令出遂與
沙克嘉巴勒等謀欲候巴延入朝擒之戒衛士嚴宮門出入
螻蛄皆為置兵巴延見之大驚召托克托責之對曰天子
所居防禦不得不爾然遂疑托克托亦增兵自衛至是巴
延以所領兵衛請帝出田托克托勸帝稱疾不往巴延固
請乃命太子雅克特吉斯出次柳林托克托遂與阿魯等合
謀悉拘京城門鑰命所親信列布城門下是夜奉帝居

玉德殿召省院大臣先後入見出五門聽命夜二鼓遣
集賽伊克徹爾率三十騎抵營中取太子入城又召楊
瑀范匯入草詔數巴延罪狀出為河南行省左丞相命
平章政事珠爾噶岱齋赴柳林黎明遣騎士至城下問
放托克托倨城上宣言有旨黜丞相一人諸從官皆無罪
可各還本衛巴延奏乞陛辭不許道出真定父老奉觴
酒以進巴延曰爾曹見子殺父事乎對曰不曾見子殺
父惟聞有臣弑君巴延俛首有慚色既而帝以巴延罪

重罰輕復降詔安置南恩州陽春縣行次江西隆興驛
病死

除奸不盡

四則附

漢皇子辯即位何太后臨朝何進與太傅袁隗輔政錄
尚書事進素知中官天下所疾兼忿蹇碩圖已及秉朝
政陰規誅之袁紹亦素有謀因進親客張津勸之曰黃
門常侍權重日久又與長樂太后專通奸利將軍宜更
清選賢良整齊天下為國家除害進然其言又以袁氏

累世寵貴海內所歸而紹素善養士能得豪傑用其從弟虎賁中郎將術亦尚氣俠故並厚待之因復博徵智謀之士龐紀何顯荀攸等與同腹心蹇碩疑不自安與中常侍趙忠等書曰大將軍兄弟秉國專朝今與天下黨人謀誅先帝左右掃滅我曹但以碩典禁兵故且沈吟今宜共閉上閤急捕誅之中常侍郭勝進同郡人也太后及進之貴幸勝有力焉故勝親信何氏遂共趙忠等議不從碩計而以其書示進進乃使黃門令收碩誅

之因領其屯兵袁紹復說進曰前竇武欲誅內寵而反為所害者以其言語漏泄而五營百官服畏中人故也今將軍既有元舅之重而兄弟並領勁兵部曲將吏皆英俊名士樂盡力命事在掌握此天贊之時也將軍宜一為天下除患名垂後世雖周之申伯何足道哉今大行在前殿將軍宜受詔領禁兵不宜輕出入宮省進甚然之乃稱疾不入陪喪又不送山陵遂與紹定籌策而以其計白太后太后不聽曰中官統領禁省自古及今

漢家故事不可廢也且先帝新棄天下我奈何楚楚與
士人共對事乎進難違太后意且欲誅其放縱者紹以
為中官親近至尊出入號令今不悉廢後必為患而太
后母舞陽君及苗數受諸宦官賂遺知進欲誅之數白
太后為其障蔽又言大將軍專殺左右擅權以弱社稷
太后疑以為然中官在省闈者或數十年封侯貴寵膠
固內外進新當重任素敬憚之雖外收大名而內不能
斷故事久不決紹等又為畫策多召四方猛將及諸豪

傑使並引兵向京城以脅太后進然之主簿陳琳入諫
曰易稱即鹿無虞諺有掩目捕雀夫微物尚不可欺以
得志况國之大事其可以詐立乎今將軍總皇威握兵
要龍驤虎步高下在心此猶鼓洪爐燎毛髮耳夫違經
合道天人所順而反委釋利器更徵外助大兵聚會疆
者為雄所謂倒持干戈授人以柄功必不成祇為亂階
進不聽遂西召前將軍董卓屯關中上林苑又使府掾
太山王匡東發其郡强弩并召東郡太守橋瑁屯城臯

使武猛都尉丁原燒孟津火照城中皆以誅宦官為言
太后猶不從苗謂進曰始共從南陽來俱以貧賤依省
內以致富貴國家之事亦何容易覆水不收宜深思之
且與省內和也進意更狐疑紹懼進變計乃脇之曰交
構已成形勢已露事留變生將軍復欲何待而不早決
之乎進于是以紹為司隸校尉假節專命擊斷從事中
郎王允為河南尹紹使洛陽方略武吏司察宦官者而促
董卓等使馳驛上奏欲進兵平樂觀太后乃恐悉罷中

常侍小黃門使還里舍惟留進素所私人以守省中諸
常侍小黃門皆詣進謝罪唯所措置進謂曰天下紛紛
正患諸君耳今董卓垂至諸君何不早各就國袁紹勸
進便于此決之至于再三進不許紹又為書告州郡詐
宣進意使捕案中官親屬進謀積日頗泄中官懼而思
變張讓子婦太后之妹也讓向子婦叩頭曰老臣得罪
當與新婦俱歸私門唯受恩累世今當遠離宮殿情懷
戀戀願復一入直得暫奉望太后陛下顏色然後退就

溝壑死不恨矣子婦言于舞陽君入白太后乃召諸常侍皆復入直八月進入長樂白太后請盡誅諸常侍以下選三署郎入守宦官廬諸宦官相謂曰大將軍稱疾不臨喪不送葬今欵入省此意何為竇氏事竟復起邪又張讓等使人潛聽具聞其語乃率常侍段珪畢嵐等數十人持兵竊自側闥入伏省中及進出因詐以太后詔召進入坐省閤讓等詰進曰天下憤憤亦非獨我曹罪也先帝嘗與太后不快幾至成敗我曹涕泣救解各出

家財千萬為禮和悅上意但欲託卿門戶耳今乃欲滅我曹種族不亦太甚乎卿言省內穢濁公卿以下忠清者為誰于是尚方監渠穆拔劍斬進于嘉德殿前讓珪等為詔以故太尉樊陵為司隸校尉少府許相為河南尹尚書得詔板疑之曰請大將軍出共議中黃門以進頭擲與尚書曰何進謀反已伏誅矣進部曲將吳匡張璋素所親幸在外聞進被害欲將兵入宮宮閤閉袁術與匡共斫攻之中黃門持兵守閤會日暮術因燒南宮

九龍門及東西宮欲以脇出讓等讓等入白太后言大將軍兵反燒宮攻尚書閣因將太后天子及陳留王又劫省內官屬從複道走北宮尚書盧植執戈于閣道窻下仰數段珪段珪等懼乃釋太后太后投閣得免袁紹與叔父隗矯詔召樊陵許相斬之苗紹乃引兵屯朱雀闕下捕得趙忠等斬之吳匡等素怨苗不與進同心而又疑其與宦官同謀乃令軍中曰殺大將軍者即車騎也士吏能為報讐乎進素有仁恩士卒皆流涕曰願致

死匡遂引兵與董卓弟奉車都尉旻攻殺苗棄其屍于苑中紹遂閉北宮門勒兵捕宦者無少長皆殺之或有無鬚而誤死者至自發露然後得免者二千餘人紹因進兵排宮或上端門屋以攻省內張讓段珪等因迫遂將帝與陳留王數十人步出穀門奔小平津公卿並出平樂觀無得從者唯尚書盧植夜馳河上王允遣河南中部掾閔貢隨植後貢至手劍斬數人餘皆投河而死明日公卿百官乃奉迎天子還宮以貢為郎中封都亭侯

董卓遂廢帝又迫殺太后殺舞陽君何氏遂亡而漢室亦自此敗亂

范曄竇武何進論 竇武何進藉元舅之資據輔政之權內倚太后臨朝之威外迎羣英乘風之勢卒而事敗閹豎身死功頹為世所悲豈智不足而權有餘乎傳曰天之廢商久矣君將興之斯宋襄公所以敗于泓也

王允既誅董卓初議赦卓部曲呂布亦數勸之既而疑曰此輩無罪從其主耳今若名為惡逆而特赦之適足

使其自疑非所以安之之道也。呂布又欲以卓財物班賜公卿將校，允又不從而素輕布，以劍客遇之，布亦負其功勞多，自誇伐，既失意，望漸不相平。允性剛稜疾惡，初懼董卓豺狼，故折節圖之。卓既殲滅，自謂無復患難，及在際會，每乏溫潤之色，仗正持重，不循權宜之計，是以羣下不甚附之。董卓將校及在位者，多涼州人，允議罷其軍，或說允曰：「涼州人素憚袁氏，而畏關東，今若一旦解兵關東，則必人人自危，可以皇甫義真為將軍就。」

領其衆因使留陝以安撫之而徐與關東通謀以觀其
變允曰不然關東舉義兵者皆吾徒耳今若距險屯陝
雖安涼州而疑關東之心甚不可也時百姓訛言當悉
誅涼州人遂轉相恐動其在關中者皆擁兵自守更相
謂曰卜彥思蔡伯喈但以董公親厚並尚從坐今既不
赦我曹而欲解兵今日解兵明日當復為魚肉矣卓部
曲將李傕郭汜等先將兵在關東因不自安遂合謀為
亂攻圍長安城陷呂布奔走布駐馬青瑣門外招允曰

公可以去乎允曰若蒙社稷之靈上安國家吾之願也如其不獲則奉身以死之朝廷幼少恃我而已臨難苟免吾不忍也努力謝關東諸公勤以國家為念初允以同郡宋翼為左馮翊王宏為右扶風是時三輔民庶熾盛兵穀富實李傕等欲即殺允懼二郡為患乃先徵翼宏宏遣使謂翼曰郭汜李傕以我二人在外故未危王公今日就徵明日俱族計將安出翼曰雖禍福難量然王命所不得避也宏曰義兵鼎沸在于董卓况其黨與

乎若舉兵共討君側惡人山東必應之此轉禍為福之計也翼不從宏不能獨立遂俱就徵下廷尉僉乃收允及翼宏并殺之

唐張易之昌宗之誅也洛州長史薛季昶謂張柬之敬暉曰二凶雖除產祿猶在去草不去根終當復生二人曰大事已定彼猶几上肉耳夫何能為所誅已多不可復益也季昶歎曰吾不知死所矣朝邑尉武強劉幽求亦謂桓彥範敬暉曰武三思尚存公輩終無葬地若不

早圖噬臍無及不從及中宗即位上官婕妤好薦三思於
韋后引入禁中中宗遂與三思圖議政事張東之等數
勸中宗誅諸武中宗不聽東之等或撫牀歎憤或彈指
出血曰吾所以不誅諸武者欲使上自誅之以張天子
之威耳今反如此事勢已去知復奈何三思與韋后日
夜譖暉等云恃功專權將不利於社稷中宗信之三思
等因為中宗畫策不若封暉等為王罷其政事外不失
尊寵功臣內實奪之權中宗以為然以敬暉為平陽王

桓彥範為扶陽王張柬之為漢陽王袁恕己為南陽王
崔玄暉為博陽王罷知政事後張柬之表請歸襄州養
疾遂以柬之為襄州刺史三思以敬暉桓彥範袁恕己
尚在京師忌之俱出為滑洛豫三州刺史陰令人疏皇
后穢行勝於天津橋請加廢黜中宗大怒命李承嘉窮
覈其事承嘉奏言敬暉桓彥範張柬之袁恕己崔玄暉
使人為之雖云廢后實謀大逆請族誅之乃以周利用
奉使嶺外比至柬之玄暉已死遇彥範於貴州令左右

縛之曳於竹槎之上肉盡至骨然後杖殺得暉副而殺之恕已素服黃金利用逼之使飲野葛汁盡數升不死不勝毒憤培地爪甲殆盡仍捶殺之利用還



經濟類編卷九十一